

## MOSCOVIA SIVE

pauci sciunt. Communicant sub utraque specie, miscentes panem vino, seu corpus sanguine. Pueris septem annorum porrigunt Sacramentum: dicuntque tum hominem peccare. Festos dies viri præstantiores peractis sacris, epulis, ebrietate, & vestitu eleganti venerantur: vulgus & servi plerumque laborant: dicentes, feriari, & à labore abstinere, dominorum esse. Purgatorium non credunt: pro defunctis tamen sacra faciunt. Aqua benedicta nemo se aspergit, nisi à sacerdote aspergatur. Ieiunant in Quadragesima 7 perpetuas septimanas. Matrimonia contrahunt. Bigamiam concedunt, sed vix legitimum matrimonium esse putant. Divortia admittunt. Adulterium non appellant, nisi quis cum alterius uxore consueverit, Mulierum conditio miserima est. Nullam enim honestam credunt, nisi domi conclusa vivat, adeoque custodiatur, ut nunquam prodeat. Gens ipsa astuta & fallax, & uti supra dictum, magis servitute, quam libertate gaudens. Omnes se Principis servos fatentur. Raro illi est quies. Nam aut bellum Lithuanis, aut Livoniensibus, aut Tartaris infert. aut si nullum bellum gerit, sunt in præfidiis circa Tanaim & Occam fluvios, ad reprimendas Tartarorum deprædationes. Tunicas oblongas, sine plicis, manicis strictioribus, Hungarorum fere more gestant; ocreas fere rubeas easque breviores, ut quæ genua non attingant: soleasque ferreis claviculis munitas habent. Ventrem nequaquam sed femora cingunt. atque adeo pubetenus, quo magis promineat venter, cingulum demittunt. Iustitiam strenue exercent in prædones. Furta & homicidia raro capitali poena puniuntur. Monetam argenteam habent, non rotunda sed oblonga & ovali quodammodo forma. Pellibus nobilissimis ac preciosis, quæ hinc per totam Europam exportantur, regio abundat; & ubique fere silvosa est.

*Regionis  
Indoles.*

Regionis cælum adeo salubre est, ut ibi ultra Tanais fontes, præsertim in Septentrionem, ac etiam magna ex parte Orientem versus, nulla hominum memoria pestis grassata fuerit. Habent tamen familiarem morbum intestinorum & capitis, pesti haud absimilem, quem ipsi calorem *Ogniouva* appellant. Hoc quotquot corripiuntur, paucis diebus extinguuntur. Ager ubique arenosus, qui mediocri siccitatis aut humiditatis excessu segetes enecat. Accedit ad hæc aspera aeris intemperies, qua sata quandoque ad maturitatem non perveniunt. Tam intensa quandoque hic sunt frigora, ut terra dehiscat, & aqua in aerem effusa sputaque ex ore projecta, antequam terram contingant, congelentur. Anno 1526 arbores rigore hyemis prorsus periisse dicuntur. adeo ut complures verdarii, (quos ipsi *Gonecz* vocant) in vehiculis gelu concreti, reperti sint. Fuerunt, qui tum pecora funibus alligata, Moscoviam, ex proximis pagis ducerent, vique frigoris oppressi, una cum pe-

coribus perirent. Quin & urfi stimulante fame relictis sylvis passim per vicinas villas discurrebant, inque domos irruebant. Atque tam intenso frigori æstus non dispar quandoque respondet, nam anno illum sequente, omnia sata segetesque nimio solis ardore exusta fuerunt, adeo ut flammam, ignemque conciperent, cuius fumus ita regionem omnem oppleverat, ut degentium in ea hominum oculi graviter fumo læsi fuerint, quin & caligo quædam oborta fuit, oculos multorum excæcans. Atque hæc quidem latius describit Sigismundus Baro ab Herberstein, apud quem harum rerum studiosum & curiosum lectorem remittimus.

*Commercia.*

Commercia, quæ magna hinc copia exportantur, sunt: Pelles omnis generis, sed præcipue zebellinæ, sive sabellinæ, quas Pechora suppeditat: vulpes nigræ & rubræ, quibus Siberia abundat; atque etiam albæ; martes, castores; hementinorum pelliculæ pulcherrimæ; luporum, lynxium, &c. cera præterea, mel, sebum, taurorum & bubalorum tergora, oleum ex phocarum arvina coctum, Ickary sive caveary, linum & canabum, sal, pix, vitrum, quod illi *slude*, nos Rufficum vocamus, & ferrum.

Russici principis regimen fere se habet ad Turcici imperii modum, cuius principia politica studiose videtur imitari. Nam primum omnia sibi vindicat, & non modo vulgus, sed & nobilitatem duro servitio premit, & populum gravibus tributis exhaurit: præterquam quod nobilitati aliquam libertatis speciem indulget, ad tenuiores, ubicumque nobiles ipsius beneficio terras possident, acrius opprimendos: & plebi quoque libertatis aliquam quasi larvam relinquit, qua ipsis licet terras suas testamento liberis suis transcribere.

*Status politicus & civilis.*

Principale regimen consistit in legibus ferendis & abrogandis, publicis magistratibus creandis, bello gerendo, aut pace sive induciis paciscendis, foederibus quoque cum exteris principibus & rebus publ. faciendis; pœnis corporalibus infligendis aut condonandis; denique in omnibus civilibus & criminalibus judiciis. Princeps & Senatus illius plane absoluta utitur potestate, ita ut non modo supremus sit legislator, sed & executor. Nam leges omnes sine ullo publico parlamento prævio promulgat. In quibus examinandis præter privatos consiliarios, nullos adhibet præter paucos episcopos, abbates atque ecclesiasticos; ut melius superstitioso vulgo imponat, cui nihil sacrum & rectum videtur, nisi cui ipsorum sacerdotes affuerint, nihil durum putatur, cui illi consenserint. Itaque Principes Ecclesiasticos homines multis immunitatibus & honoribus cumulant, gnari, nullum firmitus vinculum esse tyrannicæ dominationis, quam superstitionem vulgi & rituum receptorum pertinacem observantiam. Deinde nullum est munus publicum quantævis dignationis, quod